



Ақмешіт

12 наурыз
сейсенбі
№21 (2031)
2024 жыл

апталығы

Газет
1994 жылдың 15 сәуірінен
бастап шығады

• Қалалық қоғамдық-саяси әлеуметтік-
ақпараттық тарихи-танымдық газет •
E-mail: akmeshit.kz@mail.ru



■ БАС РЕДАКТОР БАҒАНЫ

Сәби сүю бақыты – анаға Тәңірден берілген сыйдың ең кереметі. Ана бақытын сезіну жүректі нұрға бөлеп, айнала мейірімге толады. Кейіпкеріміз Ақару Әбдүмәлікқызы бес жыл дегенде ана бақытына бөленді. Оған дейін ол денсаулығымен күресті, алдына «қалай болғанда да ана атанамын» деген мақсат қойды. Бірақ жігерлі жан мақсатына жетті. Бүгінде Нүрпейіс пен Ақарудың Аңсар есімді ұлы бар. Содан бері ұлына қараған қос жұптың әр таны шүкіршілікпен атып, әр кеші Аллаға алғыс айтумен өтуде.

Көптен күткен сәби дүниеге келген кезде кейіпкерім менімен өз қуанышын бөлісе отырып, «тәте, қазір көптеген отбасылар сәби сүйе алмай қиналып жүр. Мен олардың жанын жақсы түсінемін. Себебі басымнан өтті. Бірақ қазір Алланың қалауымен ұлды болдым. Үмітімді үзбедім. Отбасындағы баға жетпес осы бақытқа қалай қол жеткізгенімді газет арқылы айтқым келеді» деген еді. Біз қарсы болмадық. Өйткені Ақарудың арманын аңсап жүрген нәзік жандар қаншама?!

«АҢСАҒАН СӘБИ» АНА БАҚЫТЫНА БӨЛЕДІ



«СИҚЫРШЫ ДӘРІГЕР» ДЕГЕН КІМ?

Жақында Ақарудың өзі қайта хабарласты. Оған себеп – қалаға кейіпкеріміздің дәрігері Алмаз Ибрагимов келген екен. Сол сәтті пайдаланып, бір топ қызылордалық аналар дәрігермен кездесіп, алғыстарын жеткізді. Осы қуаныштың куәсі ретінде Ақару бізді де шақырды.

Дәрігермен кездесу «Экомед» орталығының біздің аймақтағы филиалында өтті. Сенесіз бе? Астанадан арнайы келген Алмаз Құрманәліұлын күткен нәзік жандар өте көп болды. «Экомед Астана» орталығының медициналық директоры, репродуктологы, Алмаз Құрманәліұлы осы салада қызмет атқарып келе жатқанына жиырма жылға жуықтап қалған. Емделушілері оны «сиқыршы дәрігер» атап кеткен. Содан да болар, сиқыршы маманға сырқатының сырын айтуға келгендер қарасы көбейіп, бәрі дәрігер кеңесін алғысы келді. Бір жағы кенес алу тегін жүрді.

Кезекке тұрғандардың жанарында бір үміт оты барын сездік. Бірі «дәрігер не айтар екен?» деп алаңдаса, енді бірі «мендегі үміт отын өшірмесе екен» деген арман тұрды. Сол сәтте ішке «Ибрагимовтің балалары» атанып кеткен сүп-сүйкімді ұл-қыздарын, бір қолында гүл мен тәттілерін ұстаған аналар кіріп келді. Қолы алтын, жүрегі жұмсақ, жүзі нұрға толы дәрігерге қаралып, барлық емін бастан-аяқ алып, соңын сәби бақытына жеткізген маман болғандықтан, еліміз бойынша Ибрагимовтің балалары көп.

Аналар ішке кіргендегі кезді сөзбен айтып жеткізу мүмкін емес еді... Кішкентай бүлдіршіндер тәй-тәйлап келгенде кезекте тұрғандар «бізге де жұғысты болсыншы» деген тілегін айтып, тіпті арасында балақайлардың басынан сипап жатқандары да кездесті. Ал аналары мәз. Олар еш қарсы болмады. Өйткені үмітпен күткендердің жанын жақсы түсінеді. Балақайлар болса жатырап, жылап, ешкімге жолар емес. Бұл да бір қызықты сәт болды.

Содан мықты маман иесі отырған кабинетке кірдік. Дәрігер бізді жайдары жүзімен қарсы алып, ақ батасын да берді. Ал емделушілерінің денсаулығын сұрап, ашық-жарқын әңгімесін айтты. Қарбаластың арасында тілші ретінде бізден де тілдесуге уақыт тапты.

Елімізде әрбір алтыншы жұп сәби сүюді армандайды. ҚР Денсаулық сақтау министрлігінің мәліметі бойынша қазір 15 мың ерлі-зайыпты беделік диагнозымен есепте тұр. «Аңсаған сәби» бағдарламасы іске қосылғалы бері 20 мың әйел жасанды ұрықтандыру қызметін алған. Бұл МӘМС аясында қаржыландырылады. Әлеуметтік медициналық сақтандыру қорында ЭҚҰ-ға кімдер қатыса алады және оған жолдаманы қалай алады, қайда өтуге болады деген сынды сұрақтарға жауап берді.

3-БЕТТЕ

СУДЫҢ ЖАЙЫН ДИҚАН ҒАНА ТҮСІНЕР

Табиғаттың қаусар байлығы саналатын су мәселесі қай кезеңде де күн тәрбінен түскен емес. Өйткені тіршілік атаулының бойына қан жүгіртетін, айналаны көгертетін, табиғатқа жан бітіретін – су. Сарқырап аққан Сырдарияның сирақтан келіп тұрғанын көру – әрбір тұрғынның жүрегіні ауыртатыны сөзсіз. Аймақтағы ахуалды осы көріністен-ақ білуге болады.



Таяуда аталған мәселе бойынша өңірде саладағы талай мықтының басын қосқан келелі басқосу өтті. Әңгіменің әлқиссасын жиыннан бастайық, «Су ресурстары: сумен тұрақты қамтамасыз етудің проблемалары мен перспективалары» тақырыбындағы көшпелі отырысқа ҚР Парламенті Сенатының депутаттары, Су ресурстары және ирригация бірінші вице-министрі Болат Бекнияз, ауыл шаруашылығы вице-министрі Бағлан Бекбауов, облыстық, аудандық мәслихат депутаттары, ғылыми зерттеу институттарының өкілдері, су шаруашылығының ардагерлері, су шаруашылығы ұйымдары мен ауыл шаруашылығы құрылымдардың басшылары қатысты. Бұл түйткілді шешімін табуға ел Президентінен де әлсін-әлсін көмек сұрап, ұсыныстарын жеткізіп

жүрген облыс әкімі Нұрлыбек Нәлібаев жиында мәселені төтесінен қойды.

– Су шаруашылығы саласындағы негізгі мәселелердің шешілуі үшін осындай жиындардың маңызы өте зор деп ойлаймын. Өңірдің басты су артериясы – Сырдария трансшекаралық өзені облыстың барлық аумағынан ағып өтеді. Оның бойында елді мекендердің 85% - ы орналасқан және облыс халқының 93%-дан астамы өзен маңында тұрады. Облысымыздың табиғи ерекшелігіне ауа райы мен топырақ құрамына бейімделген Сыр күрші аймақтың негізгі дақылды болып жылдар бойы қалыптасқан. Сыр өңірінің экономикалық және экологиялық жағдайы, халықтың тыныс-тіршілігі Сырдария өзенінің сулығына және Арал теңізіне тікелей байланысты, – делі аймақ басшысы.

2-БЕТТЕ



4-БЕТТЕ



Суреттер ашық дереккөзден алынды

4-БЕТТЕ

«Біз өз қолымызбен қаладық, иығымызбен көтердік, қол жаймадық...»

Биыл қалалық «Ақмешіт апталығы» газетінің жарыққа шыққанына отыз жыл. Сыр өңіріндегі алғашқы жекеменшік басылым ретінде жарық көріп, алғашқы жылдардан-ақ жұрт іздеп оқытын газетке айналған еді. Аудиториясы жас талғамайтын, түрлі тақырыпқа қалам тартқан, аға буын да, жастар жағы да жазған-сызғанын алып, «Ақмешіт апталығы» газетінің редакциясын жиі үйірсектегені басылымның ә дегеннен ел көңілінің шыққанын байқатса керек. Алғашқы жылдардан бастап басылымда ұлт мәселесін арқау еткен өзекті мәселелер де, жастар жайы, қоғамның үнін деп басқан тақырыптар жүйелі жазылды. Әсіресе тіл тазалығы, ұлттың тарихы мен өнерін насихаттаған басылымның жарыққа шыққан күннен бастап көтерер жүгі жеңіл болған жоқ. Газеттің іргесін қалаған, әрі алғашқы редакторы Әділхан Бәймен бастап, Аманжол Сақыпұлы, Дүйсенбек Аяшұлы, Әділ Ботпанов секілді талантты жастармен бірге тәуелсіздіктің алғашқы жылдарында ел енесін тіктемеген қиын уақытта өз күштерімен газет шығаруы ерлікпен пара-пар іс еді десек артық айтқандық емес. Сол жылдардан бері басылым талай кезеңді бастан өткерді. 2004 жылы газеттің бас редакторы Ә.Бәймен дүниеден озғаннан кейін газет жайы қалай болар екен деген сауал шығармашылық ұжымның ғана емес, оқырманның көкейіндегі де сауал болатын. Дегенмен газет жабылмады. «Ақмешіт апталығы» газетінің жарыққа шығуына тер төккен, іргесін бірге қаласқан шәкірттері басылымды сақтап қалды. Газеттің тағдыры қыл үстінде тұрғанда сақтап қалған Аманжол Сақыпұлының 2005 жылы жарияланған «Әдекең жаққан от сөнбейді» атты мақаласынан шәкірттерінің ұстаз аманатына адалдық танытқаны сезіледі. «Шәкіртсіз ұстаз тұл» деп жатамыз. Тұл қалған адамның Әдекең емес. Бүгінгі күні алды елуге таяған жорналшы қауымнан бастап Әдекеңді ұстаз санайтындар легі жетіп артылады. Кешегі күні газет Әдекеңсіз қалған тұста аға аманатын жалғастыруды жөн санаған болатынбыз. Осы мақсатты ныққа артқан соң бүгін де тәуекелге бел буып отырмыз. Мақсат Әдекең жаққан от сөнбесін, Әдекең шығарған газет жойылмасын, асыл ағаның көзі болып оқырманымен қауыша берсін», – деп жазады. Ұстаз жаққан отты шәкірттері өшірмеді. Одан кейін де талай белестерді бағындырып, бір жылдары қалалық әкімдіктің газетіне айналып, шаһардың тыныс-тіршілігінен хабар таратқан «Ақмешіт апталығы» 2014 жылдан бері «Сыр медиа» ЖШС қарамағында аптасына екі рет жарыққа шығып келеді.

Басылым тарихында бүгінгі күнге дейін он редактор қызмет етіпті. Газеттің тұңғыш редакторы Әділхан Бәймен ағамыздан кейін газет тізгінін қолға алған Нұрлан Көбегенұлы, Нұржан Нұрмаханов, Нағымжан Сауяев, Мұрат Жетпісбаев, Кенжалы Ерімбетов, Дүйсенбек Аяшұлы, Әділжан Үмбетов, Қаныбек Әбдуов, Азиз Батырбеков басылымның мазмұнын байытып, газеттің сапасын арттыруға тер төкті.

Басылымның мерейлі жылында, қасиетті рамазан айының алғашқы күнінде ағалар салған жолды жалғастыру жауапкершілігі маған жүктелді. «Ақмешіт апталығы» газеті мен үшін бөтен емес. Журналистикаға қадам басқан шағымызда шимай-шатпағымызды түзеп, жарыққа шығарған, есімімізді елге танытқан осы басылым еді. Бүгінгі күнге дейін де бас редактордың орынбасары ретінде осы ұжымда еңбек етіп, оқырманға сапалы дүние ұсынуға ұлес қосып келеміз. Ал газет тізгінін ұстау жауапкершілік жүгін еселей түсті. Ең алдымен бізге сенім артып, газетке жазылған оқырман алдында жауапты екенімізді әркез естен шығармай, алдағы күнде де сапалы дүние ұсынуға қызмет ете береміз. Қазақта «арық сөйлеп, семіз шық» деген жақсы сөз бар. Жұмыс нәтижесі уақыт еншісінде. Бір айтатыны, әр газет шығарған сайын аға буынның естелігіндегі мына жолдар есімізге түседі. «Біз өз қолымызбен қаладық, иығымызбен көтердік, қол жаймадық...» деп оқырманға сыр ақтарғаны бар. Бұл мазмұнды газет шығару жолында ауыр жүк арқалаған ағалардың кейінгі буынға аманатындай әсер етті, намысымызды қамшылай түскендей.

Гүлмира ДІЛДӘБЕКОВА

